

Maricarmen Bikker, lider di scout:

“Mi kier conoce un sociedad cu ta husga menos”

ORANJESTAD

Maricarmen Bikker, ta un hobencita di 15 aña cu ta atende La Salle College. Den e entrevista aki e ta conta Bon Dia Aruba tocante kico e ta haci den scouting y cual cambio e lo kier mira den sociedad ora e ta yega na hubentud.

Recientemente tambe Bikker a wordo nomina pa e competencia Poder di Hubentud, pa motibo cu e ta haci hopi trabou boluntario pero tambe ta fungi como un lider di scout pa muchanan entre 11 pa 15 aña. Bikker ta conta cu el a cuminsa haci trabou boluntario desde tempo e tin 12 aña. E ta comenta cu e miho parti di trabou boluntario ta wak



hende haya asina un sonrisa riba nan cara. Pero tambe con den hopi ocasion nan ta keda hopi agradecido cu e trabou cu e ta haci pa nan.

Un trabou dificil

Bikker, cu no tin mucho diferencia den edad cu e muchanan cu e ta mentor, ta bisa Bon Dia Aruba cu e

trabou cu e tin como lider di scouting no ta uno facil. E ta bisa cu como lider e ta su trabou pa sigura cu tur e otro muchanan siña ta disciplina. Scouting, segun Bikker ta algo cu ta prepara mucha pa henter nan bida. Pa siña con pa responde ora nan ta haya nan mes den obstaculonan y con pa traha cu otro. “E ta un trabou dushi, pero tambe hopi dificil pasobra mi mester



traha cu mucha y no ta tur mucha ta mesun cos”.

Aunke Bikker tin 15 aña so, Bon Dia Aruba a puntra su persona si ya caba e tin un idea di kico e lo kier studia den futuro. El a bisa cu el lo kier studia ciencia forensico. Pero no tin duda cu sigur el lo logra esaki. Recientemente Bikker a bay over pa 4de klas, nada mas y nada menos cu como e miho di klas. Elsa Krosendijk, cu ta e coordinado di e proyecto Poder di Hubentud, a expresa cu ora muchanan cu a wordo nomina pa e participa den e competencia resalta asina ki. Nan como comision ta sinti orguyoso pasobra nan



ta ricibi afirmacion cu nan ta scogiendo e hobennan corecto.

Hubentud na Aruba

Ora e ta yega na sociedad di Aruba, Bikker ta bisa cu e lo kier mira un sociedad unda hende ta husga menos. Pasobra e echo cu hende ta wordo husga prome cu nan papia mes ya caba ta crea hopi problema caminda no mester tin.

Mescos cu den e entrevista reciente cu Kenneth Vrolijk, Bikker tambe ta comparti e opinion cu hobennan mester wordo duna un oportunidad pa mostra kico nan por haci. Hopi biaha ora cos malo pasa di biaha hende ta sali dilanti bisa “e mucha jong nan ey atrobe”. Mientras cu ora hoben destaca, masha poco cos ta wordo bisa of comparti. Bikker a wordo nomina como

un hoben cu ta destaca den sociedad pa su lider di scout Ora Ubao kende ta Jacilyn Boekhoudt. E ta subraya cu e nominacion a bin manera un sorpresa pe. Pero e ta sinti hopi contento cu hende eyfo ta aprecia su trabou y ta kere e merece elogio. Manera Bon Dia Aruba a menciona prome caba, E vision di e proyecto aki ta pa stimula y pa apoya hobennan logra nan metanan. Tambe pa yuda hobennan crea metanan concreto y duradero. Pone hobennan compromete na un nivel personal y profesional. Un lider cu por educa y comparti y inspira hobennan den comunidad.

E hobennan cu ta resalta y ta wordo selecciona lo wordo invita pa participa na un di e cursonan cu mensualmente lo wordo treci dilanti pa entre otro FADA, Wit Gele Kruis, Famia Planea etc. □

